

# Ina suletta cassa da malsauns

Votaziun dals 11 da mars 2007

■ **(anr/ld) In comité schlargà da la sinistra ha lantschà ier a Berna la campagna en favur da l'iniziativa per ina cassa da malsauns unitara e sociala. Il comité recumonda in moratori per l'augment da las premias. Il sistem cumprovà da reducziun da las premias duai vegnir extendì era sin il stand mez.** L'iniziativa pretenda ina suletta cassa da malsauns per tut la Svizra tenor il model da l'AVS. Las cassas existentas vegessan schliadas si. Ils custs per la sanadad vegnan incassads dal singul pajataglia sin fundament da sias entradas e da sia facultad. Vinavant dessi premias variantas per mintga chantun. L'iniziativa pertutga be l'assicuranza da basa.

La presidenta dal comité *Therese*

*Frösch* ha constatà che l'augment annual da las premias per l'assicuranza da malsauns occupeschia il pievel sco strusch in'otra dumonda. L'iniziativa per ina cassa da malsauns unitara e sociala che vegn en votaziun ils 11 da mars 2007 tutgia in punct fitg sensibel. La nova iniziativa saja transparenta e sociala. En vista a questa situaziun saja quai cler ch'ils managers e profitaders da l'actual sistem d'assicuranza da basa – in sistem da pseudo- concorrenza – sajan gnervus. Mintga visiun da sgarschur saja era bainvegnida als lobists da la politica per motivar votantas e votants da dir na, ha Frösch manegià. Ina dira critica ha la presidenta dal comité drizzà a Santésuisse, che haja fatg maldiever da daners da las premias per sia campagna da

propaganda cunter l'iniziativa. Frösch ha recumandà da retegnair per ils onns 2005 e 2006 mintgamai 3 francs da las premias dals singuls assicurads a Santésuisse.

*Pierre Théraulaz*, il president dal personal svizzer da tgira, ha punctuà ch'il sistem actual n'haja gè nagins avantatgs ni per ils pazients ni per il sistem da sanadad. Las cassas da malsauns fetschian tut il pussaivel per reducir la tgira necessaria dals pazients, ha criticà il president.

## Be 10 procent pajan dapli

*Nathalie Imboden* da l'Unìun sindacala svizra ha caracterisà ils scenaris da Santésuisse per engianonds e confus. Fatg saja che las premias sajan s'augmentadas da-

pi l'introducziun da l'obligatori 1996 blier pli ferm ch'ils custs per la sanadad. La concorrenza tranter las singulas cassas da malsauns na funcziunia betg, custia dentant blers raps e muntia ina part dal problem existent. La cassa unitara vegnia a procurar che las subvenziuns da las premias possian vegnir schlargidas er en favur dal stand mez, pretenda Imboden. Oz pon var 30% da la populaziun profiter da las subvenziuns. En l'avegnir duai quella quota vegnir augmentada a var 70%, uschia ch'era il stand mez possa profiter. Uffants e giuvenils na pajan naginas premias pli. Sulettamein ils pli ritgs, quai vul dir var 10% da la populaziun, stuessan quintar cun premias pli autas che fin uss, han ils spezialists dal comité calculà.